

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 67 (1982)
Heft: 18

Artikel: Co il cavalut verd fuss bunamein vegnius cotschens
Autor: Derungs, Ursicin G.G.
DOI: <https://doi.org/10.5169/seals-881490>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 13.12.2025

ETH-Bibliothek Zürich, E-Periodica, <https://www.e-periodica.ch>

Co il cavalut verd fuss bunamein vegnius cotschens

dad Ursicin G.G. Derungs

Inaga ei il cavalut verd ius el marcau. Cheu pudeva el buca smarvegliar avunda. Adina glied per las vias, tuts vestgi da dumengias era ils luverdis. Tgei altezia casas, e co ellas tarlichavan cun lur preits de veider! Ellas vitrinas saveva el buca mo contemplar las custeivladads ch'el veva tochen ussa strusch viu inaga: uras, bratschalets, teilas, monduras en tuttas colurs (deno en siu verd), glasa e cuppas de cristagl, mantials de pial preziosa ed aunc biaras autras caussas, tut sfundrau en glisch caulda e giavinonta. Tons pèrs electric, tontas cazzolas veva el tochen ussa insumma mai viu. El mirava cun bucca e nas.

Ellas vitrinas veseva el denton era siu agen maletg. Gl'emprem tertgava el d'haver anflau el marcau in auter cavagl verd ed ei selegraus zun fetg. El ha entschiet a rir e clamar: Hi, hi, hi . . . Mo l'auter fageva adina ils medems moviments sco el: in cumpogn lungurus. Quel prendeva mai l'iniziativa de rir ni de far in sigliot. Adina stueva el entscheiver. Tochen ch'enzatgi ha detg ad el che quei seigi el sez, siu maletg. Il cavalut ei vegnius trests, gie el ha bunamein entschiet a seturpegiar de buca sez esser s'encurschius de quei. E lu ha el aunc inaga mirau el spieghel dellas vitrinas ed ha sefatg en con differentes ch'el era dals auters. Gie, verds sco el era negin. Ed el steva cheu sco sch'el fuss nius e vegness contemplaus da tschels.

Quei ei stau l'emprema gada ch'il cavalut verd fuss bunamein vegnius cotschens.

* * *

Quei che cudizzava buca pauc sias marveglias eran las vias, tuttas de sulada. Co ses quater calzers tunavan flot el tact cu el mava sur trottuars e vias: Glop, glop, glop . . . E lu ils autos e trams che carravan tras il marcau quasi schi dabot sco el cu el mava en galop.

Inaga ha el vuliu prender in tram. Biars enconuschevan el gia, salidavan schizun e rievàn ed eran tut cuntents. Lu emblidava il cavalut verd ch'el seigi persuls verds ed haveva era buca mustgas de vegnir cotschens. Mo cu el ha vuliu prender il tram, lu han tuts stuiu rir. El ei sefatgs en ch'ei era buca sempel ded ir el tram cun tuttas quater combas entiras. Cun in tec

stuschar e buntganar eis el serabitschaus viaden. Tschels stevan empau da stretg, ed ei mava.

Quei ei stau la secunda gada ch'il cavalut verd fuss bunamein vegnius cotschens.

* * *

In di envidan ses parents en el ded ir empau el marcau. Ins vegli prender in taxi. In taxi! Quei veva il cavalut verd gia daditg sperau e spitgau. Ei van pia giu sper via. Il cavalut era leghers e cuntents e fageva segls e sigliots . . . Ir cun auto! Igl auto vegn, il schofér dil taxi descenda cun eleganza ed arva la porta per ses hosps. Hop, hop – e nies cavalut ei el taxi, davostier sil meglier plaz. «Halt, halt», di seriusamein il schofér, pren il cavalut per la cuma e trai el ord il taxi. «Igl emprem ils carschi!» Quei tun serius ha permalau el. Tuts stevan cheu cun fatschas schi solemnas sc'in tschagrund frestg, eran serius e honzelis. In'onda veglia vegn igl emprem vidlunder, lu in aug, in'otra onda, las zavrinas, epi el. Il schofér siara plein curtesia la porta. Il cavalut vess pudiu sfundrar ella tiara dil turpetg. El saveva era buca co star cheu cun sias combas.

Quei ei stau la tiarza gada ch'il cavalut verd fuss bunamein vegnius cotschens – sco ils auters cavals. Mo el ha manteniù sia color.

La morala ei la viarcla dils lassis.

La pli verdeivla verdad ei la manzegna.

*Buca tema ils morts,
els han calau da morder.*

*Tgi che colurescha ils levzs
banduna il paradis.*

*Sche VRIN fuss la fin dil mund,
nua fuss lu il paradis?*

*Ils buns mieran;
tgei lein pomai far culs schliats?*

*Pertgei perdegia la Baselgia buca
la cuminonza dils pucconts?*

Hendri Spescha